

LEYENDA DE LA BASA DE LA MORA, DE PLAN

Por LUCIA DUESO LASCORZ

—Yaya—¿Per qué le dizen al Ibón de Plan, “La Basa de la mora”? Una boz de mozeta, nerbiosa, curiosa y expresiba, rompe el silenzio d’una bilada d’inbierno.

Ye, una cozina de Plan, con un fogaril en tierra, y, per alrelore, tres cadieras, granizas, de zresera. En la chuminera, creman troncos gordizos de caixigo, per es cantos, y, en drento, chisporroteyan las ramas secas de freixel, chopo y caixigo mezclás... Las flamas puyan per alrelore d’un caldére granizo de cobre, anque se y fa cozé-re la pastura, des animals del día sigujente. Per difuera, la luna plena, embolica de sombras fantásticas y d’inmaculáus reluzientes, es árbols nebáus y las lisas superfizies, d’es telláus punchonudos. Frío reblare d’estrelas, en la noyte chelada.

Una familia agundante, s’achunta, t’ascuchare a la güela.

Zinco zagaléz rubios, de güellos grans, algúns berdes, y atos pardos, asperan interesáus, fito, fito. La may, escucha ’l dialogo d’es críos con la güela, mientras la rueca, cubierta de lana negra, se torna flaca, en las suyas mans ábils. La güela, muebe las cardas a compás mientras empezipia el suyo relato. Uns segundos. Y, sólo se siente el crepitare d’es tizons, las cardas peinando la lana, y, el fuso chirando abentáu, en las mans de la may. El pay de noches, no y ye. Un pregón de l’aguazil a llamáu as bezinos ta l’ayuntamiento. Cuan se retire, es trobará a toz ya descansando.

La güela empezipia el cuento: Ye una misacha alta, de cara blanca, y, de grans güellos azuls. Más bien rezia de güeso, paix flaca, porque la bida que leba, d'apencare de contino, no tiene tiempo ta la olganza. Ye un cuerpo acostumbrau al sacrificio y a la bida dura, de la montaña oszense. Pero, ixe troballo no a agotáu la bena de la suya espiritualidá. No se troba cansada. Y, todas las nueys, cuan toz son aredore del fogaril, es suyos labios se abren tan contare cosas biellas. Y, tiene un encanto imposible de resistire, la suya boz, cuan charra de Santos, de bruxas, de mozez, de pastós, de lobos, de gozes y uenas, bibius cada día, con l'aspeanza d'una chen, que tiene fé.

—Ta sabére per qué es antipasáus, llamón así al ibón de Plan, t'as de lebare luego, a punto de día. Y puyare tan Ibón y allegare alí, antes de que salga el sol.

—Yaya, ¿Cualquié día del año ye adecuáu ta dire ta Ibón y sabére per qué se diz "La basa de la Mora"?

—No, filla mía, sólo yay un día en tó l'año ta sabelo.

—Y, ¿Qué día ye ixe, y, per qué?

—Boy a dezitelo: El unico día del año ta sabelo ye la maitinada del día de San Chuan Bautista... Si ixe día t'en bas ta Ibón, llegas ali antes de la salida del sol, y, te labas la cara en la basa, berás, cuan salga'l sol, que l'augua se muebe. Primé, aspazié...Dispués, mas aprisa. Asta que en el mismo puesto de la basa, anq'allega primeré el sol, se y lebanta una forma brillante...Y, cuan el sol s'astendido per tót lo que diz l'azul de la basa, ixa forma brillante, se torna en una señora majiza.

Se queda plantá, d'enzima l'augua azul, com'una reina en un palazio con suelo de cristal, y, techo d'estrelas. Si le beis la cara, la trobarás tan bien paixida, como no n'aigas bisto un atra, en tu bida. Al instante empezipia un baile majizo, que'mbelesa, per dénzima l'augua de la basa... S'eslisa per l'augua y... baila... baila. Bestida dénde la cabeza asta's peus, con culebras enrocadas de toz es colós... royas, azuls, amarillas, berdás, plenas de piedras d'oro, de plata, de corals, de diamantes, y, todas se l'n religan per es brazos, per el cuello, per es peus, per las mans, y per tot. Reluzen de mil maneras, cuan la siñora baila el suyo baile de reina, d'enzima'l miradore de l'augua.

Per qué, dizen que la señora que baila en el Ibón de Plan, en la maitinada del día de San Chuan, ye l'anima d'una prinzesa mora, que se ba perdere per es picos de Xistáu, cuan fuyiba d'una d'aquellas biellas guerras que tanto gosaban abundáre en España, entre moros y cristianos...Y, la suya anima baga per es bosques, y, se deixa biére en la maitinada del día de San Chuan, no más a las personas que tienen un corazón limpio. Per ixo, cal labase la cara, en la basa, ta podere biéla.

Con l'anima limpia y el corazón limpio, podrás, filla mía, biéla, bela bez, si puyas ta la basa en ixe día. Si ye que y puyas alguna maitinada de San Chuan, ta Ibón, y no la biéses, abrás de pensare en labate l'anima...Sólo es güellos limpios, pueden biére a la prinzesa mora de las cumbres.

¿Te'n acordarás agora, per qué se diz a Ibón de Plan, "La basa de la Mora"...?

NIEVES-LUCÍA DUESO LASCORZ